

Cometen Predigt

- nach seiner Gnad vnd Barmhertzigkeit / so fern der Morgen von Abend / lest er vnser vbertretung von vns sein / vnd wie sich ein Vater vber seine Kinder Erbarmet / so Erbarmet sich auch der HErr vber die so ihm fürchten / Drumb wol wo ist doch ein solcher Gott wie du bist? Der die Sünde vergiebt / vnd er lest die missthat den vbrigen seines Erbtheils / denn er ist Barmhertzig / er wird sich auch vnser widerumb Erbarmen / vnser missthat dämpffen / ja alle vnser Sünde in die Tieffe des Meers werffen / das derselben von nu an vnd in alle Ewigkeit nicht sol gedacht werden / V wie ist die Barmhertzigkeit des HErrn so gros / man kan sie weder wehren noch mehren / sie ist ja so gros als er selber. Heist drumb wol mit vns allen miteinander / wann wir alle Morgen hintreten / den Cometen ansehen : Misericordia Domini quod non consumti sumus , die güte des HErrn ist das wir nicht gar aus sein / seine Barmhertzigkeit ist alle Morgen newe / vnd gehet auff vber die so ihm fürchten. Das sol vns allen sehr tröstlich sein / vnd in erwegung dieses Cometen / vnser betrübte trawrige Herzen vnd Seelen erquickten vnd auffmuntern.
3.
Exhorta. Vorauff zum 3. Vnd endlich in dieser Predigt die vermanung: Dieser ganze Cometen discurs vermanet vns zu wahrer rechtschaffener ernstlicher Busz vnd bekehrung von vnsern Sünden zu Gott im Himmel / welche denn wann sie nach dieser vermanung sol fürgenommen werden / müssen wir für allen dingen / Viererley wol in acht nehmen vnd practiciren / Als:
1. Peccatorum agnitionem , Das wir vnser viel vnd mannifaltige Sünde erkennen vnd bekennen / d; peccavi vnd peccavimus wol intoniren , wir haben gesündigt